

*Зам, тээврийн хөгжлийн сайдын  
2019 оны 06 сарын 12-ны 187 тоот  
тушаалын 04 дүгээр хавсралт*



**ИНД - 140**

Иргэний Нисэхийн Дүрэм

**Нисэхийн аюулгүйн хамгаалалтын үйлчилгээний байгууллагын  
гэрчилгээжүүлэлт**

Иргэний нисэхийн ерөнхий газар

## **ДҮРМИЙН ТАЙЛБАР**

ИНД-140 нь нисэхийн аюулгүйн хамгаалалтын үйлчилгээ үзүүлэхийг зорьж байгаа байгууллагын гэрчилгээжүүлэлтийн болон үйл ажиллагааны зохицуулалтын шаардлагыг тогтооно.

ИНД-140-ийг, ICAO-гийн Хавсралт 17-гийн дагуу Монгол Улсын хүлээсэн үүргийг биелүүлэх, дараах байгууллагад аюулгүйн хамгаалалтын үйлчилгээ үзүүлэх зорилгоор боловсруулсан:

- аюулгүйн хамгаалалттай аэродромд;
- аюулгүйн хамгаалалттай навигацийн байгууламжид.

ИНД-140-ийг, байгууллагын гэрчилгээжүүлэлттэй холбоотой дүрмийн стандарт загвараар боловсруулсан ба энэ загвар нь гэрчилгээжүүлэлтийн (босго стандарт), үйл ажиллагааны (байнгын үйл ажиллагаа) болон аюулгүйн хамгаалалтын үйлчилгээ эрхэлж байгаа этгээдэд аюулгүй байдлын аудитын (байнгын хяналт) тусгай шаардлагыг тогтооно.

**Энэ Дүрэм нь Иргэний нисэхийн асуудал эрхэлсэн Засгийн газрын гишүүний баталсан ИНД-140-ийн цахим хувилбар бөгөөд зөвхөн ишлэл хийх зорилгоор хэрэглэнэ. Хүчин төгөлдөр ИНД-140, түүний нэмэлт, өөрчлөлтийн хуулбарыг ИНЕГ-аас, эсхүл [www.mcaa.gov.mn](http://www.mcaa.gov.mn) веб сайтаас татаж авах боломжтой.**

**Мэдээлэл**

Гишүүн улсуудын иргэний нисэхийн Дүрмийг сайжруулах замаар иргэний нисэхийн салбарт нэгдсэн нэг Дүрмийн зохицуулалтад шилжих Олон улсын иргэний нисэхийн байгууллагын 1992 оны 29-р чуулганы А29-3 тогтоолыг хэрэгжүүлэх зорилгоор, Монгол Улс болон Шинэ Зеланд улсын ИНЕГ-ын хооронд 1999 оны 5 сарын 6-нд байгуулсан “Техникийн Хамтын Ажиллагааны Санамж Бичиг”-ийг үндэслэн Монгол Улсын Иргэний нисэхийн дүрмийг боловсруулсан.

**Өөрчлөлтийн түүх****Хүчинтэй огноо**

Анхны боловсруулалт	2002 оны 12 сарын 20
Нэмэлт, өөрчлөлт 1	2010 оны 06 сарын 17
Нэмэлт, өөрчлөлт 2	2010 оны 10 сарын 05
Нэмэлт, өөрчлөлт 3 (Шинэчлэлт)	2019 оны 06 сарын 12

**Тэмдэглэл:** ИНД-140-ийн шинэчлэлтийг монгол, англи хэл дээр, NZ Part 140-ийн 2013 оны 01 сарын 16-ны А.6-д үндэслэн боловсруулсан болно.

## Гарчиг

<b>А Бүлэг - Ерөнхий зүйл</b> .....	<b>1</b>
140.1. Хамрах хүрээ.....	1
140.3. Нэр томъёо ба товчлол.....	1
140.5. Гэрчилгээний шаардлага.....	1
140.7. Гэрчилгээ эзэмших хүсэлт гаргах.....	1
140.9. Гэрчилгээ олгох.....	1
140.11. Гэрчилгээ эзэмшигчийн гүйцэтгэх ажил, үүрэг.....	2
140.13. Гэрчилгээний хугацаа.....	2
140.15. Гэрчилгээг сунгах.....	2
<b>В Бүлэг - Гэрчилгээжүүлэлтийн шаардлага</b> .....	<b>3</b>
140.51. Ажилтанд тавих шаардлага.....	3
140.53. Үйл ажиллагааны журам тогтоох.....	3
140.55. Баримт бичиг.....	4
140.57. Бүртгэл хөтлөх.....	4
140.59. Дотоод чанар баталгаажуулалт.....	5
140.61. Байгууллагын Ерөнхий заавар.....	6
<b>С Бүлэг - Үйл ажиллагааны шаардлага</b> .....	<b>7</b>
140.101. Байнгын хэрэгжилт.....	7
140.103. Ерөнхий зааварт өөрчлөлт оруулах.....	7
<b>Хавсралт А - Аюулгүйн хамгаалалтын үйл ажиллагааны стандарт</b> .....	<b>9</b>
A.1. Үзлэгийн дараах бүсийг шалгах.....	9
A.2. Үзлэгийн дараах бүсийн аюулгүйн хамгаалалтын хяналт.....	9
A.3. Агаарын хөлгийн шалгалт.....	9
A.4. Аюулгүйн үзлэгийн цэгийн хамгаалалт болон төхөөрөмж.....	10
A.5. Хүнд аюулгүйн үзлэг хийх.....	11
A.6. Рентген төхөөрөмжөөр аюулгүйн үзлэг хийх.....	11
A.7. Гар тээшийг гараар шалгах.....	12
A.9. Аюулгүйн үзлэг хийж байгаа этгээдэд тавих хяналт.....	12
A.10. Аюулгүйн үзлэгийн зөрчил.....	13
A.11. Аюулгүйн үзлэгийн цэгийн онцгой нөхцөлийн арга хэмжээний төлөвлөгөө болон дохио.....	13
A.12. Хөдөлгөөнт эргүүл.....	14
A.13. Шалган нэвтрүүлэх цэгийн аюулгүйн хамгаалалт.....	15
A.14. Аюулгүйн хамгаалалтын гэнэтийн сонгох үзлэг.....	15
A.15. Нэвтрэх үнэмлэх болон зөвшөөрлийг шалгаж бататгах.....	16
A.16. Аюулгүйн хамгаалалтын дагалдах үйлчилгээ.....	16
A.17. Явган эргүүл.....	16
A.18. Агаарын хөлгийн аюулгүйн хамгаалалт.....	17
A.19. Эргүүлийн тээврийн хэрэгсэл.....	17
A.20. Нууцлал болон мэдээлэл.....	17
A.21. Бусад байгууллагатай харилцах.....	18
A.22. НАХ-ын ажилтны эрүүл мэндийн шаардлага.....	18
A.23. Сургалт.....	18
A.24. Давтан сорилт хийх.....	20
A.25. Өндөржүүлсэн аюулгүйн хамгаалалттай бүс.....	22
A.26. Аюулгүйн хамгаалалттай холбоотой хориг (шилжилт).....	24
A.27. Зөвшөөрөгдөхгүй үйлдэл (шилжилт).....	24
A.28. Нисэх буудлын нэвтрэх үнэмлэх (шилжилт).....	25

## **А Бүлэг - Ерөнхий зүйл**

### **140.1. Хамрах хүрээ**

Энэ Дүрэм нь аюулгүйн хамгаалалттай аэродром, эсхүл аюулгүйн хамгаалалттай навигацийн байгууламжид нисэхийн аюулгүйн хамгаалалтын үйлчилгээ үзүүлэх байгууллагын гэрчилгээжүүлэлтийн болон үйл ажиллагааны шаардлагыг тогтооно.

### **140.3. Нэр томьёо ба товчлол**

Энэ Дүрэмтэй холбоотой нэр томьёо болон товчлол нь ИНД-ийн нэр томьёоны тайлбарт багтсан.

### **140.5. Гэрчилгээний шаардлага**

Энэ Дүрмийн дагуу олгосон нисэхийн аюулгүйн хамгаалалтын үйлчилгээний байгууллагын (цаашид НАХҮБ гэх) гэрчилгээний эрхийн хүрээ болон нөхцөлөөс гадуур, аливаа этгээд аюулгүйн хамгаалалттай аэродром, эсхүл аюулгүйн хамгаалалттай навигацийн байгууламжид нисэхийн аюулгүйн хамгаалалтын үйлчилгээ үзүүлэхгүй.

### **140.7. Гэрчилгээ эзэмших хүсэлт гаргах**

НАХҮБ-ын гэрчилгээ эзэмших хүсэлт гаргагч нь САА 24140/01 маягтыг бөглөж, дараах баримт бичгийн хамт Даргад хүргүүлнэ:

- (1) 140.61-д шаардсан Ерөнхий заавар;
- (2) зохих төлбөрийн баримт.

### **140.9. Гэрчилгээ олгох**

Хууль болон энэ Дүрмийн дагуу, Дарга дараах тохиолдолд НАХҮБ-ын гэрчилгээ олгоно, хэрэв:

- (1) хүсэлт гаргагчийн 140.51-д шаардсан удирдах ажилтан нь тохирох зөв хүн бол;
- (2) хүсэлт гаргагч нь:
  - (i) НАХҮБ бол; эсхүл
  - (ii) аюулгүйн хамгаалалттай аэродром, эсхүл аюулгүйн хамгаалалттай навигацийн байгууламжийн үйл ажиллагаа эрхлэгч нь тухайн аэродром, эсхүл навигацийн байгууламжид нисэхийн аюулгүйн хамгаалалтын үйлчилгээ үзүүлэх бол;
- (3) хүсэлт гаргагчийн Ерөнхий заавар нь В Бүлгийн шаардлага хангасан бол;
- (4) тухайн гэрчилгээг олгох нь нисэхийн аюулгүй байдал болон аюулгүйн хамгаалалтын ашиг сонирхолд харшлахгүй бол.

**140.11. Гэрчилгээ эзэмшигчийн гүйцэтгэх ажил, үүрэг**

(a) НАХҮБ-ын гэрчилгээ эзэмшигч нь Ерөнхий заавартаа заасан байрлал бүрд дараах ажил, үүргийг гүйцэтгэнэ:

- (1) аюулгүйн хамгаалалттай аэродромд:
  - (i) олон улсын болон орон нутгийн зорчигч үйлчилгээний агаарын хөлгийн зорчигч, хөлгийн баг, тээшинд аюулгүйн үзлэг хийх, эсхүл Даргын үзлэг хийхийг шаардсан бусад үйлчилгээнд аюулгүйн үзлэг хийх;
  - (ii) шаардлагатай бол агаарын хөлгийг шалгах;
  - (iii) аэродромын аюулгүйн хамгаалалтын эргүүл хийх;
  - (iv) Даргын шаардсан, өндөржүүлсэн аюулгүйн хамгаалалттай бүсэд байгаа, эсхүл нэвтрэх гэж байгаа этгээд, эд зүйл, бодис, эсхүл тээврийн хэрэгсэлд Даргын баталсан аюулгүйн үзлэгийн тусгай хэлбэр, эсхүл аргачлалын дагуу аюулгүйн үзлэг болон шалгалт хийх;
- (2) хамгаалалттай навигацийн байгууламжид эргүүл хийх;
- (3) иргэний нисэх болон түүнд ажиллагсад, эсхүл түүний үйлчилгээг авч байгаа этгээдийг хамгаалахтай холбоотой аюулгүйн хамгаалалтын арга техник, тогтолцоо, хэрэгсэл, практик дадал болон журмыг хянах, судлах, түүний талаар тогтмол мэдээлэлтэй байх;
- (4) өөрийн ажил үүргийг энэ Дүрмийн дагуу илүү үр дүнтэй гүйцэтгэх зорилгоор цагдаа, төрийн байгууллага, нисэх буудлын эрх бүхий байгууллага, үйл ажиллагаа эрхлэгч болон бусад улсын нисэх буудлын аюулгүйн хамгаалалтын үйлчилгээ хариуцсан эрх бүхий байгууллага, холбогдох олон улсын байгууллагатай хамтран ажиллах.

(b) Энэ зүйлийн (a)-г үл харгалзан, НАХҮБ нь Монгол Улсын Нисэхийн аюулгүйн хамгаалалтын үндэсний хөтөлбөрт заасан ажил, үүргийг гүйцэтгэнэ.

(c) Даргад Хуулиар олгосон эрхийг хэрэгжүүлэх зорилгоор, энэ Дүрмийн дагуу эрх олгогдсон этгээд нь Даргын шаардлагатай гэж үзсэн бүс, эсхүл талбайд нэвтрэх хяналт тавих, эсхүл хориглох арга хэмжээг авч болно. (шилжилт)

**140.13. Гэрчилгээний хугацаа**

- (a) НАХҮБ-ын гэрчилгээг 5 жил хүртэл хугацаагаар олгож, эсхүл сунгаж болно.
- (b) НАХҮБ-ын гэрчилгээ нь түүний хугацаа дууссан, эсхүл түдгэлзүүлсэн, эсхүл хүчингүй болгосноос бусад тохиолдолд хүчинтэй хэвээр байна.
- (c) НАХҮБ-ын гэрчилгээ эзэмшигч нь гэрчилгээний хугацаа дууссан, эсхүл хүчингүйд тооцсон тохиолдолд гэрчилгээг Даргад хураалгана.
- (d) НАХҮБ-ын гэрчилгээ эзэмшигчийн гэрчилгээг түдгэлзүүлсэн бол зохих баталгаажуулсан тэмдэглэл хийлгэхээр гэрчилгээг Даргад хүргүүлнэ.

**140.15. Гэрчилгээг сунгах**

(a) Гэрчилгээ эзэмшигч нь НАХҮБ-ын гэрчилгээг сунгуулах хүсэлтийг САА 24140/01 маягтын дагуу гаргаж Даргад хүргүүлнэ.

(b) Гэрчилгээ сунгуулах хүсэлтийг гэрчилгээнд заасан хугацаанд, хэрэв сунгах хугацаа заагаагүй бол гэрчилгээний хугацаа дуусахаас 30-аас доошгүй хоногийн өмнө гаргана.

## **В Бүлэг - Гэрчилгээжүүлэлтийн шаардлага**

### **140.51. Ажилтанд тавих шаардлага**

(a) НАХҮБ-ын гэрчилгээ эзэмших хүсэлт гаргагч нь дараах ажилтныг үндсэн ажилтнаар ажиллуулна:

- (1) тухайн байгууллагын гүйцэтгэж байгаа бүх үйл ажиллагааг санхүүжүүлэх ба энэ Дүрэмд заасан шаардлагын дагуу гүйцэтгэж чадахаа хүсэлт гаргагчийн байгууллагын хүрээнд бататгах эрхтэй, Гүйцэтгэх захирлаар тодорхойлогдсон удирдах ажилтан;
- (2) дараах удирдах ажилтан, эсхүл удирдах ажилтнууд:
  - (i) хүсэлт гаргагчийн байгууллага нь энэ Дүрмийн шаардлагыг хангаж байгааг бататгах үүрэг хариуцлага хүлээсэн;
  - (ii) Гүйцэтгэх захирлын өмнө эцсийн хариуцлага хүлээсэн;
- (3) 140.61(а)(7)-д дэлгэрэнгүй заасан нисэхийн аюулгүйн хамгаалалтын үйлчилгээг төлөвлөх, шалгах, хянах болон гүйцэтгэх хангалттай тооны ажилтан.

(b) Хүсэлт гаргагч нь:

- (1) тухайн ажил үүрэг гүйцэтгэхээр хүсэлт гаргасан этгээдийн ур чадварт суурь үнэлгээ хийх журам болон НАХ-ын ажилтны ажлын байрны шаардлагыг дараах шалгуурыг харгалзан тогтооно:
  - (i) боловсрол;
  - (ii) харилцааны чадвар;
  - (iii) зан харьцаа;
  - (iv) туршлага;
  - (v) эрүүл мэнд;
- (2) ажилтнуудаас НАХ-ын ажилтан болох этгээдийг томилно;
- (3) НАХ-ын ажилтныг сургах болон ур чадварыг хадгалах журмыг тогтооно;
- (4) 140.61(а)(7)-д дэлгэрэнгүй заасан нисэхийн аюулгүйн хамгаалалтын үйлчилгээг төлөвлөх, шалгах, хянах болон гүйцэтгэх ажилтанд түүний эрхийн хүрээг тодорхойлсон баримт бичиг олгоно.

### **140.53. Үйл ажиллагааны журам тогтоох**

(a) НАХҮБ-ын гэрчилгээ эзэмших хүсэлт гаргагч нь тогтоосон аэродромд аюулгүйн хамгаалалтын үйлчилгээ үзүүлэх бол Хавсралт А-д заасан шаардлагыг хангахад шаардлагатай журмыг тогтооно.

(b) НАХҮБ-ын гэрчилгээ эзэмших хүсэлт гаргагч нь тогтоосон навигацийн байгууламжид аюулгүйн хамгаалалтын үйлчилгээ үзүүлэх бол А.12(d)-д заасан шаардлагыг хангахад шаардлагатай журмыг тогтооно.

**140.55. Баримт бичиг**

(a) НАХҮБ-ын гэрчилгээ эзэмших хүсэлт гаргагч нь, ажилтан ажил үүргээ гүйцэтгэхэд шаардлагатай, нисэхийн аюулгүйн хамгаалалтын үйлчилгээг дэмжихэд чиглэсэн бүх баримт бичгийг авч ашиглах боломжтой хэлбэрээр хангадаг болохыг бататгах журмыг тогтооно.

(b) Энэ зүйлийн (a)-д заасан баримт бичигт дараах баримт бичиг багтсан байна:

- (1) холбогдох бүх хууль тогтоомж;
- (2) нисэхийн аюулгүйн хамгаалалттай холбоотой олон улсын техникийн заавар, эсхүл мэдэгдэл;
- (3) Даргаас тухайн гэрчилгээ эзэмшигчид олгосон баримт бичиг;
- (4) гэрчилгээ эзэмшигчийн Ерөнхий заавар.

(c) Хүсэлт гаргагч нь энэ зүйлийн (a)-д заасан, дараах шаардлагыг бататгах баримт бичгийн хяналтын журамтай байна:

- (1) тухайн баримт бичгийг гаргахын өмнө холбогдох ажилтан хянаж, баталдаг байх;
- (2) холбогдох баримт бичгийн хүчинтэй хувь нь, ажилтан тухайн баримт бичгийг ашиглахад хэрэгтэй байрлал бүрд бэлэн байх;
- (3) хугацаа нь дууссан баримт бичгийг олгох, эсхүл ашиглах бүх цэгээс нэн даруй хурааж авдаг байх;
- (4) баримт бичигт орсон өөрчлөлтийг холбогдох ажилтан хянаж, баталдаг байх;
- (5) баримт бичгийн хүчинтэй хувь нь танигддаг байх;
- (6) байгууллагын Ерөнхий зааварт, тухайн үйлчилгээ үзүүлэгч, түүний үйлчилгээ, журам болон байгууламжийн тодорхойлолт хүчинтэй хэвээр хадгалагдаж байхаар өөрчлөлт хийдэг байх.

(d) Хүсэлт гаргагч нь Ерөнхий зааврын хувийг 140.61(a)(5)-д заасан байрлал бүрд байлгаж, хөтлөх журмыг тогтоосон байна.

**140.57. Бүртгэл хөтлөх**

(a) НАХҮБ-ын гэрчилгээ эзэмших хүсэлт гаргагч нь энэ Дүрмийн нийцлийг бататгахад шаардлагатай, бүртгэлийг таньж тогтоох, цуглуулах, индексжүүлэх, хадгалах болон хөтлөх журмыг тогтоосон байна.

(b) Хүсэлт гаргагч нь дараах журмыг тогтоосон байна:

- (1) түүний НАХ-ын ажилтны туршлага, мэргэшил, ур чадвар, сургалт, эрүүл мэндийн үнэлгээ болон хүчинтэй зөвшөөрлийн дэлгэрэнгүй мэдээллийг багтаасан бүртгэл хөтлөх;
- (2) дараах шаардлагыг хангасан болохыг бататгах:
  - (i) бүх бүртгэл нь гаргацтай бөгөөд байнгын, арилдаггүй байх;
  - (ii) энэ зүйлийн (b)(1)-д шаардсан бүртгэлийг, гэрчилгээ эзэмшигч тухайн этгээдэд олгосон эрхийг зогсоосон өдрөөс хойш 2 жилийн хугацаанд хадгалдаг байх;
  - (iii) энэ зүйлийн (b)(1)-д шаардсанаас бусад бүртгэлийг 2 жилийн хугацаанд хадгалдаг байх.



**140.59. Дотоод чанар баталгаажуулалт**

(a) НАХҮБ-ын гэрчилгээ эзэмших хүсэлт гаргагч нь, энэ Дүрмээр шаардсан журам нь шаардлага хангасан ба тухайн байгууллага түүнийг хэрэгжүүлж байгааг бататгах зорилгоор дотоод чанар баталгаажуулалтын тогтолцоог бүрдүүлсэн байна.

(b) Дотоод чанар баталгаажуулалтын тогтолцоо нь дараах журмыг багтаасан байна:

- (1) хүсэлт гаргагчийн байгууллагын зорилго болон түүний үйлчлүүлэгчийн хүсэл эрмэлзэл, хэрэгцээнд тохирсон Аюулгүйн хамгаалалтын бодлого болон аюулгүйн хамгаалалтын бодлогын журам;
- (2) тухайн тогтолцоонд оршиж байгаа хүндрэлтэй асуудал, эсхүл түүний боломжит шалтгааныг тогтоох зорилгоор гэмтэл, зөрчлийн тайлан болон ажилтан, үйлчлүүлэгчийн санал хүсэлтийг багтаасан, Чанарын үзүүлэлтэд мониторинг хийдэг болохыг бататгах журам;
- (3) тухайн тогтолцоонд илэрсэн хүндрэлтэй асуудлыг залруулдаг болохыг бататгах, Залруулах арга хэмжээний журам;
- (4) тухайн тогтолцоонд илрүүлсэн хүндрэлтэй асуудлын боломжит шалтгааныг арилгадаг болохыг бататгах Урьдчилан сэргийлэх арга хэмжээний журам;
- (5) хүсэлт гаргагчийн байгууллага нь өөрийн Ерөнхий зааварт заасан журамтай нийцэж байгаа болон аюулгүйн хамгаалалтын бодлогод тусгасан зорилтод хүрснийг шалгах, Чанарын дотоод аудитын хөтөлбөр;
- (6) шаардлагатай тохиолдолд, статистикийн дүн шинжилгээний ашиглалтыг багтаасан, дотоод чанар баталгаажуулалтын тогтолцооны байнгын тохирол болон үр дүн нь энэ Дүрмийн шаардлагыг хангаж байгааг бататгах удирдлагын дүгнэлт хийх журам;
- (7) дотоод чанар баталгаажуулалт хариуцсан удирдах ажилтан нь аюулгүйн хамгаалалтад нөлөөлөх асуудлаар Гүйцэтгэх захиралтай шууд харьцах эрхтэй болохыг бататгах журам.

(c) Аюулгүйн хамгаалалтын бодлогын журам нь, аюулгүйн хамгаалалтын бодлогыг байгууллагын бүх түвшинд ойлгодог, хэрэгжүүлдэг болон мөрддөг болохыг бататгана.

(d) Залруулах арга хэмжээний журамд дараах үйл ажиллагааг хэрхэн хийхийг заасан байна:

- (1) оршиж байгаа хүндрэлтэй асуудлыг залруулах;
- (2) тухайн арга хэмжээний үр дүнг бататгах зорилгоор залруулах арга хэмжээг эргэн шалгах;
- (3) удирдах ажилтан залруулах арга хэмжээний үр дүнг үнэлэх.

(e) Урьдчилан сэргийлэх арга хэмжээний журамд дараах үйл ажиллагааг хэрхэн хийхийг заасан байна:

- (1) хүндрэл үүсгэж болох асуудлыг залруулах;
- (2) тухайн арга хэмжээний үр дүнг бататгах зорилгоор урьдчилан сэргийлэх арга хэмжээг эргэн шалгах;
- (3) урьдчилан сэргийлэх арга хэмжээний үр дүнд, энэ Дүрмийн дагуу шаардсан журамд өөрчлөлт оруулах;

- (4) удирдах ажилтан урьдчилан сэргийлэх арга хэмжээний үр дүнг үнэлэх.
- (f) Чанарын дотоод аудитын хөтөлбөр нь дараах шаардлагыг хангасан байна:
- (1) аудит хийгдэх ажиллагааны шинж чанартай уялдуулан аудитын давтамж болон байрлалыг заасан байх;
  - (2) тухайн аудитыг, сургалтад хамрагдсан бөгөөд аудит хийгдэж байгаа ажиллагаанд шууд хариуцлага хүлээдэг этгээдээс хамааралгүй ажилтан хийдэг болохыг бататгадаг байх;
  - (3) аудитын үр дүнг, аудит хийгдсэн ажиллагааг хариуцсан ажилтанд болон дотоод аудит хариуцсан менежерт мэдээлдэг болохыг бататгадаг байх;
  - (4) хэрэв тухайн аудитаар хүндрэлтэй асуудал илэрсэн бол аудит хийгдсэн ажиллагааг хариуцсан ажилтнаас урьдчилан сэргийлэх, эсхүл залруулах арга хэмжээ авахыг шаарддаг байх;
  - (5) авч хэрэгжүүлсэн залруулах, эсхүл урьдчилан сэргийлэх арга хэмжээний үр дүнд дүгнэлт хийх зорилгоор эргэн шалгах аудит хийдэг болохыг бататгадаг байх.
- (g) Удирдлагын дүгнэлт хийх журам нь дараах шаардлагыг хангасан байна:
- (1) тухайн тогтолцооны байнгын үр дүнтэй байх хэрэгцээ шаардлагыг авч үзсэний үндсэн дээр, чанар баталгаажуулалтын тогтолцооны удирдлагын дүгнэлт хийх давтамжийг тодорхойлсон байх;
  - (2) тухайн чанар баталгаажуулалтын тогтолцоонд дүгнэлт хийх менежерийг тогтоосон байх;
  - (3) тухайн дүгнэлтийн үр дүнг дүгнэж, бүртгэл хөтөлдөг болохыг бататгасан байх.

#### **140.61. Байгууллагын Ерөнхий заавар**

- (a) НАХҮБ-ын гэрчилгээ эзэмших хүсэлт гаргагч нь дараах журмыг багтаасан Ерөнхий зааврыг Даргад хүргүүлэх үүрэгтэй:
- (1) Ерөнхий заавар нь дараах шаардлагыг хангасныг баталж, байгууллагын нэрийн өмнөөс Гүйцэтгэх захирал гарын үсэг зурсан мэдэгдэл:
    - (i) тухайн байгууллагыг тодорхойлсон ба энэ Дүрмийн байнгын хэрэгжилтийг бататгах арга, хэлбэрийг харуулсан байх;
    - (ii) тухайн байгууллагын ажилтнууд байнга дагаж мөрддөг байх;
  - (2) 140.51(а)(1) болон (2)-т шаардсан ажилтны нэр болон албан тушаал;
  - (3) тухайн байгууллагын нэрийн өмнөөс Даргатай шууд харилцах асуудлыг багтаасан, энэ зүйлийн (а)(2)-т заасан этгээдийн үүрэг, хариуцлага;
  - (4) энэ зүйлийн (а)(2)-т заасан ажилтан болон хяналтын ажилтны хариуцлагын хамаарлыг харуулсан байгууллагын бүтцийн зураг;
  - (5) нисэхийн аюулгүйн хамгаалалтын үйлчилгээ үзүүлэхээр төлөвлөж байгаа байгууллагын бүх байрлал болон байрлал бүрийн байгууламжийн дэлгэрэнгүй мэдээлэл;
  - (6) энэ зүйлийн (а)(5)-д заасан байрлал бүрд шаардлагатай, тухайн байгууллагын ажиллагсдын бүтцийн хураангуй;

- (7) байрлал бүрд үзүүлэх нисэхийн аюулгүйн хамгаалалтын үйлчилгээний дэлгэрэнгүй мэдээлэл;
  - (8) эрүүл мэндийн үзлэгийн дүгнэлтийн хамрах хүрээ болон Хавсралт А.22-т шаардсан бие бялдрын үнэлгээний аргын дэлгэрэнгүй мэдээлэл;
  - (9) дараах дүрэмд шаардсан, хүсэлт гаргагчийн журмын дэлгэрэнгүй мэдээлэл:
    - (i) 140.53 - үйл ажиллагааны журмын талаар;
    - (ii) 140.55 - нисэхийн аюулгүйн хамгаалалтын баримт бичгийн хяналт болон түгээлтийн талаар;
    - (iii) 140.57 - бүртгэлийг таньж тогтоох, цуглуулах, индексжүүлэх, хадгалах болон хөтлөх талаар;
    - (iv) 140.59 - хүсэлт гаргагчийн байгууллагын дотоод чанар баталгаажуулалтын талаар.
  - (10) Ерөнхий зааврыг хянах, нэмэлт өөрчлөлт оруулах болон түгээх журам;
  - (11) ИНД-12-ын дагуу аюулгүйн хамгаалалтын зөрчлийг Даргад мэдээлэх, шинжлэн шалгах болон тайлагнах журам;
  - (12) аюултай барааны илрүүлэлтийг Даргад мэдээлэх журам.
- (b) Хүсэлт гаргагчийн Ерөнхий заавар нь Даргын хүлээн зөвшөөрөхүйц байх ёстой.

## **С Бүлэг - Үйл ажиллагааны шаардлага**

### **140.101. Байнгын хэрэгжилт**

НАХҮБ-ын гэрчилгээ эзэмшигч нь:

- (1) Ерөнхий зааврын нэгээс доошгүй хүчинтэй, бүрэн хувийг Ерөнхий зааварт заасан байрлал тус бүрд, байнга хадгална;
- (2) Ерөнхий зааварт дэлгэрэнгүй заасан бүх журам болон тогтолцоог байнга дагаж мөрдөнө;
- (3) Ерөнхий зааврын холбогдох бүлгийг шаардлагатай ажилтан ажил үүргээ гүйцэтгэхдээ байнга ашиглах боломжтой байлгана;
- (4) дараах шаардлага болон стандартыг байнга хангаж, мөрдөнө:
  - (i) В Бүлгийн шаардлага;
  - (ii) 140.53-ын дагуу журамтай байхыг шаардсан Хавсралт А-ийн заалт.

### **140.103. Ерөнхий зааварт өөрчлөлт оруулах**

(a) НАХҮБ-ын гэрчилгээ эзэмшигч нь дараах үүрэгтэй:

- (1) Ерөнхий зааврын нэмэлт өөрчлөлтийг, тухайн байгууллагын тодорхойлолт нь хүчинтэй хэвээр хадгалагдаж байхаар хийсэн болохыг бататгах;
- (2) Ерөнхий зааварт оруулсан нэмэлт өөрчлөлт нь энэ Дүрмийн холбогдох шаардлагыг хангаж байгааг бататгах;
- (3) Ерөнхий зааварт заасан нэмэлт өөрчлөлтийн журмыг мөрдөх;
- (4) Ерөнхий зааварт нэмэлт өөрчлөлт оруулсан даруйд нэмэлт өөрчлөлтийн хувийг Даргад цаг алдалгүй хүргүүлэх;

- (5) нисэхийн аюулгүйн хамгаалалтын ашиг сонирхолд шаардлагатай гэж Даргын үзсэн нэмэлт өөрчлөлтийг Ерөнхий заавартаа оруулах.
- (b) Гэрчилгээ эзэмшигч нь дараах өөрчлөлтийг хийхийг санал болгож байгаа бол Даргын зөвшөөрлийг урьдчилан авах шаардлагатай:
- (1) Гүйцэтгэх захирал;
  - (2) нэр заагдсан удирдах ажилтнууд;
  - (3) нисэхийн аюулгүйн хамгаалалтын үйлчилгээ үзүүлэх байрлал;
  - (4) гэрчилгээнд заасан үйл ажиллагааны цар хүрээ;
  - (5) байгууллагын дотоод чанар баталгаажуулалтын тогтолцоо.
- (c) Энэ зүйлийн (b)-д заасан өөрчлөлтийг хийх хүсэлтийг САА 24140/01 маягтын дагуу гаргана.
- (d) Энэ зүйлийн (b)-д заасан өөрчлөлтийг хийж байх үед, эсхүл хийсний дараа дагаж мөрдөх нөхцөлийг Дарга тогтоож болно.
- (e) Гэрчилгээ эзэмшигч нь энэ зүйлийн (d)-гийн дагуу тогтоосон нөхцөлийг дагаж мөрдөх үүрэгтэй.
- (f) Энэ зүйлийн (b)-д заасан өөрчлөлт нь гэрчилгээнд нэмэлт өөрчлөлт оруулахыг шаардаж байгаа бол, гэрчилгээ эзэмшигч нь тухайн гэрчилгээг Даргад цаг алдалгүй хүргүүлнэ.

## Хавсралт А - Аюулгүйн хамгаалалтын үйл ажиллагааны стандарт

### А.1. Үзлэгийн дараах бүсийг шалгах

НАХҮБ-ын гэрчилгээ эзэмшигч нь дараах шаардлагыг бататгана:

- (1) НАХ-ын ажилтан нь үзлэгийн дараах бүсийн бүрэн бүтэн байдлыг баталгаажуулах зорилгоор дараах нөхцөлд шалгалт хийдэг байх:
  - (i) зорчигчийн аюулгүйн үзлэг эхлэхийн өмнө;
  - (ii) тухайн бүсийн хяналт алдагдсан байж болзошгүй үед.
- (2) НАХ-ын ажилтан нь үзлэгийн дараах бүсэд шалгалт хийхдээ:
  - (i) үзлэгийн дараах бүсэд ямар нэгэн зөвшөөрөгдөөгүй эд зүйл орхиогүй, эсхүл нуугаагүйг шалгадаг байх;
  - (ii) аюулгүйн үзлэгт хамрагдсан бүх этгээдийг аюулгүйн үзлэгт хамрагдаагүй этгээдээс тусгаарласныг шалгадаг байх.
- (3) дараах үечлэлээр сорилт, эсхүл шалгалт хийдэг байх:
  - (i) үзлэгийн дараах бүсийн шалгалтын нягт нямбай байдлыг 28 хоног тутамд;
  - (ii) А.24-т заасан давтан сорилт хийх шаардлагын дагуу, үзлэгийн дараах бүсийн шалгалтыг гүйцэтгэдэг НАХ-ын ажилтнуудын ур чадварыг 150 хоног тутамд.

### А.2. Үзлэгийн дараах бүсийн аюулгүйн хамгаалалтын хяналт

НАХҮБ-ын гэрчилгээ эзэмшигч нь дараах шаардлагыг бататгана:

- (1) тухайн агаарын хөлөгт зөвшөөрөгдөөгүй эд зүйл нэвтрээгүй болохыг бататгах зорилгоор, зорчигчоос бусад этгээд үзлэгийн дараах бүсэд авч орох, эсхүл хүргэх бүх бараа болон хангамжийн зүйлд аюулгүйн үзлэг, эсхүл аюулгүйн хамгаалалтын хяналт хийдэг байх;
- (2) түүний НАХ-ын ажилтан нь үзлэгийн дараах бүсийн бүрэн бүтэн байдлыг бататгах зорилгоор үзлэгийн дараах бүс доторх хөдөлгөөнд хяналт тавьдаг байх.

### А.3. Агаарын хөлгийн шалгалт

(a) НАХҮБ-ын гэрчилгээ эзэмшигч нь, түүний НАХ-ын ажилтан агаарын хөлгийн шалгалтыг хийхдээ дараах шаардлагыг хангасан болохыг бататгана:

- (1) зорчигчийн суудал, суудлын дээрх тээшний тасалгаа, шалны талбай, бие засах газар болон өмнөх үйлчилгээний зорчигчийн нэвтэрсэн байж болох бусад хэсгийг хамруулдаг байх;
- (2) бүхээгт нуусан, эсхүл бусад хэлбэрээр нэвтрүүлсэн зөвшөөрөгдөөгүй эд зүйлийг илрүүлэхийн тулд хангалттай хүчин чармайлт гаргадаг байх.

(b) Тухайн нислэг өндөр эрсдэлтэй гэж үнэлэгдсэн бол гэрчилгээ эзэмшигч дараах шаардлага хангасан болохыг бататгана:

- (1) НАХ-ын ажилтан нь үйл ажиллагаа эрхлэгчийн тусламжтайгаар тухайн агаарын хөлгийг бүрэн гүйцэд шалгасан байх;

- (2) тухайн шалгалтыг, үйл ажиллагаа эрхлэгчийн агаарын хөлөгт зориулсан шалгах хуудсыг ашиглан, төлөвлөсөн хэлбэрээр гүйцэтгэсэн байх;
  - (3) тухайн шалгалтаар, агаарын хөлөгт нуусан, эсхүл бусад хэлбэрээр нэвтрүүлсэн зөвшөөрөгдөөгүй эд зүйлийг илрүүлэх хангалттай хүчин чармайлт гаргадаг байх.
- (с) Гэрчилгээ эзэмшигч нь дараах шаардлагыг бататгана:
- (1) энэ зүйлийн (а), эсхүл (b)-гийн дагуу хийсэн шалгалтын хувьд, дараах дэлгэрэнгүй мэдээллийг багтаасан бүртгэл хөтөлдөг байх:
    - (i) тухайн шалгалтыг хийсэн ажилтны нэр;
    - (ii) илрүүлсэн зөвшөөрөгдөөгүй эд зүйл;
    - (iii) аюулгүй болгох арга хэмжээ авсан эсэх.
  - (2) дараах шаардлагыг бататгах сорилт, эсхүл шалгалт хийдэг байх:
    - (i) шалгасан байхыг шаардсан агаарын хөлгийн шалгалтын нягт нямбай байдлыг 28 хоног тутамд;
    - (ii) А.24-т заасан давтан сорилт хийх шаардлагын дагуу, аюулгүйн үзлэг хийгдээгүй, эсхүл агаарын хөлгийн өндөр эрсдэлтэй шалгалт гүйцэтгэдэг НАХ-ын ажилтнуудын ур чадварыг 150 хоног тутамд.

#### **A.4. Аюулгүйн үзлэгийн цэгийн хамгаалалт болон төхөөрөмж**

НАХҮБ-ын гэрчилгээ эзэмшигч нь дараах шаардлагыг бататгана:

- (1) тухайн аюулгүйн үзлэгийн цэг нь, аюулгүйн хамгаалалтын хяналтгүй бүсээс үзлэгийн дараах бүсэд нэвтрэх бүх этгээд тухайн цэгээр заавал дамжин өнгөрдөг байхаар байрласан байх;
- (2) аюулгүйн үзлэгийг, тухайн агаарын хөлгийн явах нислэгийг шаардлагагүй саатуулахгүй байхаар, үзлэгийн стандартыг хангасан хурдтайгаар гүйцэтгэх хангалттай тооны ажилтан болон төхөөрөмжтэй байх;
- (3) агаарын хөлөгт тээвэрлэх боломжтой, овор ихтэй эд зүйлийг бүртгэгдсэн тээш хэлбэрээр тээвэрлүүлэхээр холбогдох агаарын тээвэрлэгчид хүлээлгэн өгдөг байх;
- (4) НАХ-ын ажилтан нь стандарт сорилын биет ашиглан тухайн аюулгүйн үзлэгийн төхөөрөмжийг чадварлагаар шалгаж чадахыг бататгах зааварчилгаа авдаг байх;
- (5) аюулгүйн үзлэгийн цэгт ашиглаж байгаа металл илрүүлэгчид:
  - (i) зорчигчийн аюулгүйн үзлэг эхлэхээс өмнө Даргын хүлээн зөвшөөрөхүйц стандарт сорилын биетээр сорилт хийдэг байх;
  - (ii) зөвхөн тухайн стандарт сорилын биетийг мэдрэн, зөв ажилласан нөхцөлд ашигладаг байх.
- (6) аюулгүйн үзлэгийн цэгт ашиглаж байгаа рентген аппаратад Даргын хүлээн зөвшөөрөхүйц хэлбэрээр сорилт хийдэг байх.

**A.5. Хүнд аюулгүйн үзлэг хийх**

(a) НАХҮБ-ын гэрчилгээ эзэмшигч нь аюулгүйн үзлэгийн цэг бүрд, бүх этгээд аюулгүйн үзлэгээр орохыг анхааруулсан дараах мэдэгдлийг байрлуулна:

- (1) аюулгүйн үзлэгийг зөвхөн тухайн этгээдийн зөвшөөрөлтэйгээр түүнд, эсхүл түүний тээшинд хийдэг байх;
- (2) аюулгүйн үзлэг хийлгэхээс татгалзсан этгээдийг тухайн цэгээс цааш нэвтрүүлдэггүй байх;
- (3) аюулгүйн үзлэг хийлгэхээс татгалзсан зорчигчийг агаарын тээвэрлэгч тээвэрлэхээс татгалздаг байх.

(b) Гэрчилгээ эзэмшигч нь дараах шаардлагыг бататгана:

- (1) НАХ-ын ажилтан нь аливаа этгээдэд аюулгүйн үзлэг хийснээс бусад тохиолдолд, тухайн этгээдийг аюулгүйн үзлэгийн цэгээр дамжин үзлэгийн дараах бүсэд нэвтрэхийг зөвшөөрдөггүй байх;
- (2) тухайн этгээдийг Засгийн газраас тусгайлан чөлөөлснөөс бусад тохиолдолд, НАХ-ын ажилтан тухайн зорчигч, эсхүл багийн гишүүнд аюулгүйн үзлэг хийхгүйгээр үзлэгийн дараах бүсэд нэвтрэхийг зөвшөөрдөггүй байх;
- (3) НАХ-ын ажилтан аливаа этгээдэд аюулгүйн үзлэг хийхдээ, тухайн этгээд зөвшөөрөгдөөгүй эд зүйл тээвэрлээгүй, эсхүл биедээ авч яваагүй болохыг бататгадаг байх;
- (4) дараах шаардлагыг бататгах сорилт, эсхүл шалгалт хийдэг байх:
  - (i) аюулгүйн үзлэгийн нягт нямбай байдлыг 28 хоног тутамд;
  - (ii) А.24-т заасан давтан сорилт хийх шаардлагын дагуу, аюулгүйн үзлэг гүйцэтгэдэг НАХ-ын ажилтнуудын ур чадварыг 150 хоног тутамд.

**A.6. Рентген төхөөрөмжөөр аюулгүйн үзлэг хийх**

(a) НАХҮБ-ын гэрчилгээ эзэмшигч нь, түүний НАХ-ын ажилтан эд зүйлд рентген төхөөрөмж ашиглан аюулгүйн үзлэг хийхдээ дараах шаардлагыг хангасан болохыг бататгана:

- (1) тухайн зүйлд зөвшөөрөгдөөгүй эд зүйл агуулагдаагүй гэдэгт итгэлтэй байх;
- (2) рентген төхөөрөмжийн дэлгэцэн дээр гарсан дүрсийг 10 минутаас дээш хугацаагаар тасралтгүй ажиглахгүй байх.

(b) Тухайн эд зүйл өөр эд зүйлд агуулагдсаны улмаас рентген төхөөрөмжийн шалгалтаар зөвшөөрөгдөөгүй эд зүйл биш болох нь үнэн зөв танигдахгүй байгаа, эсхүл ямар нэг эргэлзээ байгаа бол НАХ-ын ажилтан нь эд зүйлийг зөв таних хүртэл тухайн эд зүйл, эсхүл түүнийг авч яваа этгээдийг үзлэгийн дараах бүсэд нэвтрэхийг зөвшөөрдөггүй болохыг гэрчилгээ эзэмшигч бататгана.

(c) Гэрчилгээ эзэмшигч нь дараах шаардлагыг бататгах сорилт, эсхүл шалгалт хийнэ:

- (1) рентген төхөөрөмжийн аюулгүйн үзлэгийн зөв ажиллагааг 28 хоног тутамд;
- (2) А.24-т заасан давтан сорилт хийх шаардлагын дагуу, рентген төхөөрөмжөөр аюулгүйн үзлэг гүйцэтгэдэг НАХ-ын ажилтны ур чадварыг 150 хоног тутамд.

## **А.7. Гар тээшийг гараар шалгах**

(a) НАХҮБ-ын гэрчилгээ эзэмшигч нь дараах шаардлагыг бататгана:

- (1) НАХ-ын ажилтан нь гар тээшинд гараар үзлэг хийхдээ ямар нэг зөвшөөрөгдөөгүй эд зүйл агуулагдаагүй гэдэгт итгэлтэй байх;
- (2) НАХ-ын ажилтан нь гар тээшинд ямар нэг зөвшөөрөгдөөгүй эд зүйл агуулагдаагүй гэдэгт итгэлтэй болсноос бусад тохиолдолд, тухайн тээшийг агаарын хөлгөөр тээвэрлэхийг зөвшөөрдөггүй ба агаарын хөлгөөр үйл ажиллагаа эрхлэгчид мэдэгддэг байх;
- (3) хэрэв тухайн эд зүйл тэсрэх бодис агуулсныг сэжиглэх шалтгаан байгаа бол НАХ-ын ажилтан нь А.11(b)(5)-д шаардсан журмыг мөрддөг байх.

(b) Тухайн зорчигч компьютер, видео камер, эсхүл ижил төстэй эд зүйлээ рентген төхөөрөмжөөр шалгуулахаас татгалзсан тохиолдолд НАХ-ын ажилтан нь дараах ажиллагааг гүйцэтгэх хүртэл тухайн эд зүйл болон түүнийг авч яваа этгээдийг үзлэгийн дараах бүсэд нэвтрэхийг зөвшөөрдөггүй болохыг Гэрчилгээ эзэмшигч бататгана:

- (1) хэрэв боломжтой бол тухайн эд зүйлийг гараар шалгах ба зорчигчоос тухайн төхөөрөмжийг ажиллуулахыг шаардана;
- (2) хэрэв гараар шалгах боломжгүй бол тухайн эд зүйл дараах шаардлагыг бүрэн хангасан тохиолдолд бүхээгт авч орохыг зөвшөөрч болно:
  - (i) тухайн эд зүйл хэвийн ажиллаж байгаа бол;
  - (ii) тухайн эд зүйлийн харагдах байдал нь шинэ, эсхүл шинэвтэр бол;
  - (iii) хайрцаг савны эрэг боолт гэмтсэн, эсхүл өөрчлөгдсөн шинж тэмдэггүй бол;
  - (iv) тухайн зорчигчийн төлөв байдалд эргэлзээ төрүүлэх шалтгаан ажиглагдаагүй бол;
  - (v) тухайн эд зүйл, эсхүл түүний агууламжийн хувьд эргэлзээ төрүүлэх бусад шалтгаан байхгүй бол.

(c) Гэрчилгээ эзэмшигч нь дараах шаардлагыг бататгах сорилт, эсхүл шалгалт хийнэ:

- (1) гар шалгалтын нягт нямбай байдлыг 28 хоног тутамд;
- (2) А.24-т заасан давтан сорилт хийх шаардлагын дагуу, гар шалгалт гүйцэтгэдэг НАХ-ын ажилтнуудын ур чадварыг 150 хоног тутамд.

## **А.9. Аюулгүйн үзлэг хийж байгаа этгээдэд тавих хяналт**

НАХҮБ-ын гэрчилгээ эзэмшигч нь, түүний НАХ-ын ажилтан дараах шаардлагыг хангадаг болохыг бататгана:

- (1) рентген төхөөрөмжөөр ажил үүрэг гүйцэтгэж байхдаа:
  - (i) эргэлзээ төрүүлж байгаа этгээдийн талаар анхааруулах дохио өгдөг байх;
  - (ii) авч яваа эд зүйлийг дамжлага шугам дээр байрлуулахдаа рентген төхөөрөмжөөр үзлэг шалгалт хийж байгаа НАХ-ын ажилтан үүргээ гүйцэтгэхэд хялбар байхаар байрлуулсныг бататгадаг байх;



- (2) гар металл илрүүлэгчээр ажил үүрэг гүйцэтгэж байхдаа, металл илрүүлэгч хаалга дохио өгсөн эсэхээс үл хамааран, эргэлзээ төрүүлж байгаа бүх этгээдэд аюулгүйн үзлэг хийдэг байх.

#### **A.10. Аюулгүйн үзлэгийн зөрчил**

(a) Аюулгүйн үзлэг хийгдсэн зорчигч үзлэгийн дараах бүсэд аюулгүйн үзлэг хийгдээгүй, зөвшөөрөлгүй этгээдтэй харьцсан бол, түүний НАХ-ын ажилтан дараах шаардлагыг хангадаг болохыг НАХҮБ-ын гэрчилгээ эзэмшигч бататгана:

- (1) үзлэгийн дараах бүсээс бүх хүмүүсийг гаргадаг байх;
- (2) үзлэгийн дараах бүсэд зөвшөөрөгдөөгүй эд зүйл үлдээгүй болохыг бататгах зорилгоор давтан шалгалт хийдэг байх;
- (3) А.5(b)-ийн дагуу, үзлэгийн дараах бүсэд нэвтэрч байгаа бүх этгээдийг аюулгүйн үзлэгт давтан хамруулдаг байх.

(b) Үзлэгийн дараах бүсэд, эсхүл агаарын хөлгийн бүхээгт зөвшөөрөлгүй этгээд илэрвэл аюулгүйн үзлэг хийгдсэн болон хийгдээгүй хүмүүс холилдоогүй байсан ч, энэ нь тухайн эрсдэлтэй бүсэд шалгалт хийх хангалттай нөхцөл болно.

#### **A.11. Аюулгүйн үзлэгийн цэгийн онцгой нөхцөлийн арга хэмжээний төлөвлөгөө болон дохио**

(a) НАХҮБ-ын гэрчилгээ эзэмшигч нь, аливаа этгээдийн аюулгүй байдал алдагдсан, эсхүл алдагдсан байж болох нөхцөл үүссэн тохиолдолд, аюулгүйн үзлэгийн цэг бүрд болон хамаарах өндөржүүлсэн аюулгүйн хамгаалалттай бүсийн аюулгүйн үзлэгийн цэг бүрд тухайн нөхцөл байдлыг зохицуулах журмыг тогтооно.

(b) Аюулгүйн үзлэгийн цэгүүдийн хувьд, гэрчилгээ эзэмшигч нь өөрийн журамд дараах шаардлагыг багтаасан байна:

- (1) аюулгүйн үзлэгийн цэг тус бүрд хамаарах, тухайн байгууламжийн нүүлгэн шилжүүлэх журам;
- (2) онцгой нөхцөл бий болсныг бусад НАХ-ын ажилтанд анхааруулах тогтолцоо;
- (3) НАХ-ын ажилтан аюулгүйн үзлэгийн цэг бүрд дараах нууц дохиоллыг ажиллуулах тогтолцоо:
  - (i) өөрийн аюулгүйн хамгаалалтын алба болон Цагдаагийн байгууллагад мэдэгдэх;
  - (ii) 139.57-д шаардсан Аэродромын онцгой нөхцөлийн төлөвлөгөөний шаардлагын дагуу онцгой нөхцөл бий болсон талаар холбогдох бусад оролцогчдод мэдэгдэх;
- (4) дараах тохиолдолд авах арга хэмжээ:
  - (i) аливаа этгээд аюулгүйн үзлэгийн цэгт зөвшөөрөгдөөгүй эд зүйл авч явсан ба тухайн этгээд нь гэмт хэргийн зорилготой байж болох нөхцөл байдал илэрсэн үед;
  - (ii) рентген төхөөрөмжийн дэлгэцэд зөвшөөрөгдөөгүй эд зүйл танигдсан үед НАХ-ын ажилтан тухайн зорчигчийг сэжигтэй эд зүйлээс нь тусгаарлах оролдлого хийдэг болохыг бататгах;
- (5) сэжигтэй тэсрэх хэрэгсэл илэрсэн үед авах арга хэмжээний журам:

- (i) Цагдаагийн байгууллага болон аэродромын үйл ажиллагаа эрхлэгчид мэдэгдэх;
- (ii) Аэродромын онцгой нөхцөлийн төлөвлөгөөний дагуу холбогдох бусад байгууллагад мэдэгдэх;
- (iii) тухайн бүсийг чөлөөлөхөд туслах;
- (iv) тухайн зөрчил гаргагчийг илрүүлэх болон саатуулахад Цагдаагийн байгууллагад туслах.

(c) Энэ зүйлийн (a)-д заасан журамтай өндөржүүлсэн аюулгүйн хамгаалалттай бүсийн аюулгүйн үзлэгийн цэгүүдийн хувьд, хэрэв хамааралтай бол, гэрчилгээ эзэмшигч нь энэ зүйлийн (b)-д заасан эд зүйлийг тухайн журамд оруулах үүрэгтэй.

#### **A.12. Хөдөлгөөнт эргүүл**

(a) Энэ зүйлийн (c), эсхүл (d)-д зааснаас бусад тохиолдолд, НАХҮБ-ын гэрчилгээ эзэмшигч нь, түүний НАХ-ын ажилтан дараах зорилгоор хоногийн 24 цагийн турш хөдөлгөөнт эргүүл хийдэг болохыг бататгана:

- (1) НАХҮБ-ын гэрчилгээнд заасан байрлалын аюулгүйн хамгаалалтад заналхийлж болох этгээдийг илрүүлэх;
- (2) НАХҮБ-ын гэрчилгээнд заасан байрлалын аюулгүйн хамгаалалттай холбоотой онцгой нөхцөлд яаралтай хариу арга хэмжээ авах.

(b) Гэрчилгээ эзэмшигч нь, түүний НАХ-ын ажилтан хөдөлгөөнт эргүүл хийх үедээ дараах шаардлага хангасан болохыг бататгана:

- (1) 140.61(a)(5)-д заасан, гэрчилгээ эзэмшигчийн хариуцлагын бүс дэх байгууламжийн байрлалын талаар бүрэн мэдлэгтэй байх;
- (2) энэ зүйлийн (b)(1)-д заасан бүсийг бүрэн хамарсныг бататгадаг байх;
- (3) эргүүлийг дараах байдлаар хийдэг байх:
  - (i) тогтмол бус давтамжтай;
  - (ii) зөвшөөрөлгүй тээврийн хэрэгсэл болон этгээдийг шалгаж тогтоох;
  - (iii) аэродромын аюулгүйн хамгаалалттай бүс, эсхүл хориотой бүсэд зөвшөөрөлгүй нэвтрэлтийг илрүүлэх.
- (4) аюулгүйн хамгаалалттай аэродромын хамгаалалттай бүсэд, эсхүл өндөржүүлсэн аюулгүйн хамгаалалттай бүсийн аль нэг хэсэгт аюулгүйн хамгаалалттай холбоотой онцгой нөхцөлийн дуудлага хүлээж аваад 5 минутын дотор тухайн цэгт очдог байх;
- (5) аюулгүйн хамгаалалттай бүс болон өндөржүүлсэн аюулгүйн хамгаалалттай бүс дэх ачааны болон тээвэрлэлтийн талбайд эргүүл хийдэг байх;
- (6) аэродромын аюулгүйн хамгаалалттай бүс болон өндөржүүлсэн аюулгүйн хамгаалалттай бүс дэх навигацийн байгууламжид эргүүл хийдэг байх;
- (7) аэродромын аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсийг тойрсон хашаа болон хаалт, аюулгүйн хамгаалалтын периметрийн зөрчлийг илрүүлэх зорилгоор үзлэг хийдэг байх;
- (8) энэ зүйлийн (b)(7)-д шаардсан үзлэг нь дараах шаардлагыг багтаасныг бататгадаг байх:

- (i) периметрийн хашааг шөнийн цагаар 3-аас доошгүй, өдрийн цагаар 3-аас доошгүй удаа эргэдэг байх;
- (ii) барилга байгууламжид өөр өөр цагт эргүүл хийдэг байх;
- (iii) аюулгүйн хамгаалалттай бүсийн болон өндөржүүлсэн аюулгүйн хамгаалалттай бүсийн тэмдэг тэмдэглэгээний бүрэн бүтэн байдлыг шалгадаг байх;
- (iv) шаардсан хүрээг бүрэн хамарсан болохыг бататгах периметрийн үзлэгийн бүртгэл хөтөлдөг байх.

(c) НАХҮБ нь олон улсын нисэх буудлаас бусад аэродромд аюулгүйн хамгаалалтын үйлчилгээ үзүүлдэг бол НАХ-ын ажилтан нь дараах тохиолдолд энэ зүйлийн (b)(8)-ыг дагаж мөрдөхгүйгээр, хоногт 24 цагаас бага хугацаагаар тухайн аэродромд хөдөлгөөнт эргүүл хийж болно, хэрэв:

- (1) аэродромын үйл ажиллагаа эрхлэгч нь өөрийн 24 цагийн аюулгүйн хамгаалалттай бол;
- (2) НАХ-ын ажилтан нь хуваарьт нислэг гарах цагаас 90 минутын өмнө болон нислэг гарснаас хойш 15 минутын хугацаанд эргүүл хийдэг бол.

(d) Гэрчилгээ эзэмшигч нь аюулгүйн хамгаалалттай навигацийн байгууламжийн үйл ажиллагаа эрхлэгч бөгөөд НАХ-ын ажилтныг дараах зорилгоор эргүүл хийдэг болохыг бататгадаг бол, тухайн байгууламжид 24 цагаас бага хугацаагаар хөдөлгөөнт эргүүл хийж болно:

- (1) НАХҮБ-ын гэрчилгээнд заасан навигацийн байгууламжийн үйл ажиллагааны аюулгүйн хамгаалалтад заналхийлж болох этгээдийг илрүүлэх;
- (2) НАХҮБ-ын гэрчилгээнд заасан навигацийн байгууламжийн аюулгүйн хамгаалалттай холбоотой онцгой нөхцөлд яаралтай хариу арга хэмжээ авах.

### **A.13. Шалган нэвтрүүлэх цэгийн аюулгүйн хамгаалалт**

НАХҮБ-ын гэрчилгээ эзэмшигч нь, түүний НАХ-ын ажилтан дараах шаардлага хангасан болохыг бататгана:

- (1) шалган нэвтрүүлэх цэгт ажил үүрэг гүйцэтгэж байхдаа:
  - (i) Хавсралт А.28-д заасны дагуу, зөвхөн хүчинтэй нэвтрэх үнэмлэх, эсхүл баримт бичигтэй этгээдийг шалган нэвтрүүлэх цэгээр нэвтрэхийг зөвшөөрдөг байх;
  - (ii) шалган нэвтрүүлэх цэгийг хяналтгүй орхисон аль ч үед тухайн цэгийн аюулгүйн хамгаалалт хангагдсан болохыг бататгадаг байх;
- (2) тээврийн хэрэгслийн шалган нэвтрүүлэх цэгт үүрэг гүйцэтгэж байхдаа тухайн цэгээр зөвхөн зөвшөөрөгдсөн этгээд болон тээврийн хэрэгсэл нэвтрэхийг зөвшөөрдөг байх.

### **A.14. Аюулгүйн хамгаалалтын гэнэтийн сонгох үзлэг**

НАХҮБ-ын гэрчилгээ эзэмшигч нь, түүний НАХ-ын ажилтан дараах аюулгүйн хамгаалалтын гэнэтийн сонгох үзлэг хийдэг болохыг бататгана:

- (1) аюулгүйн хамгаалалттай бүсэд, эсхүл өндөржүүлсэн аюулгүйн хамгаалалттай бүсэд байгаа, эсхүл нэвтрэх гэж байгаа этгээдээс сонгож Хавсралт А.28-д заасан хүчинтэй нэвтрэх үнэмлэх, эсхүл баримт бичигтэй эсэхийг шалгах;
- (2) тээврийн хэрэгсэл нь аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд байх зөвшөөрөлтэй эсэхийг шалгах.

#### **А.15. Нэвтрэх үнэмлэх болон зөвшөөрлийг шалгаж бататгах**

НАХҮБ-ын гэрчилгээ эзэмшигч нь, түүний НАХ-ын ажилтан дараах шаардлага хангадаг болохыг бататгах үүрэгтэй:

- (1) нэвтрэх зорилгоор ашигладаг нисгэгчийн үнэмлэх болон нэвтрэх үнэмлэхийг шалгаж бататгадаг байх;
- (2) хэрэв энэ зүйлийн (1)-д заасан баримт бичгийн хүчинтэй байдалд эргэлзэж байгаа бол тухайн үнэмлэхийг гээгдүүлсэн, хулгайлагдсан, эсхүл бусад байдлаар хүчингүй болсон эсэхийг шалгаж тогтоодог байх.

#### **А.16. Аюулгүйн хамгаалалтын дагалдах үйлчилгээ**

(a) НАХҮБ-ын гэрчилгээ эзэмшигч нь аливаа этгээд, эсхүл тээврийн хэрэгслийг НАХ-ын ажилтан дагалдах шаардлагатай нөхцөл байдлыг тогтоох журамтай байна.

(b) Гэрчилгээ эзэмшигч нь, НАХ-ын ажилтан бүр аюулгүйн хамгаалалтын дагалдах ажиллагаа гүйцэтгэж эхлэхийн өмнө дагаж байгаа этгээдэд дараах зааварчилгаа өгдөг болохыг бататгана:

- (1) хэрэв тухайн этгээд нь тээврийн хэрэгсэлтэй дагаж байгаа бол дагуулж байгаа тээврийн хэрэгслийн араас ойрхон дагах;
- (2) дагуулж байгаа ажилтны өгч байгаа бүх зааварчилгааг мөрдөх.

(c) Хэрэв дагаж байгаа этгээд нь аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд үлдэх бол тухайн этгээдийг үлдээхийн өмнө ажилтан дараах зааварчилгааг өгнө:

- (1) аюулгүйн хамгаалалтын дагалдах ажилтны тогтоосон бүсийг, дагуулж байгаа ажилтангүйгээр орхихгүй байх талаар;
- (2) тухайн бүсээс гарахад аюулгүйн хамгаалалтын дагалдах ажилтан шаардлагатай бол гэрчилгээ эзэмшигчтэй хэрхэн холбоо барих талаар.

#### **А.17. Явган эргүүл**

НАХҮБ-ын гэрчилгээ эзэмшигч нь дараах шаардлага хангасан болохыг бататгана:

- (1) НАХ-ын ажилтан нь иргэний нисэхийн аюулгүйн хамгаалалтад заналхийлэл учруулж болох этгээдийг илрүүлэх явган эргүүл хийдэг байх;
- (2) явган эргүүл хийх НАХ-ын ажилтан нь:
  - (i) хариуцсан бүс дэх байгууламжийн байрлалын талаар бүрэн мэдлэгтэй байх;
  - (ii) хариуцсан бүсийг бүрэн хамарсан эргүүл хийдэг байх;
  - (iii) мэдээлсэн, эсхүл тогтоосон аюулгүйн хамгаалалттай холбоотой зөрчилд нэн даруй хариу арга хэмжээ авдаг байх.

**A.18. Агаарын хөлгийн аюулгүйн хамгаалалт**

(a) НАХҮБ-ын гэрчилгээ эзэмшигч нь дараах шаардлагыг бататгана:

- (1) тухайн байгууллагын гэрчилгээнд заасан аэродромд байрлаж байгаа НАХ-ын ажилтан нь:
  - (i) үйлчилгээнд байгаа бүх агаарын хөлгийг байнгын ерөнхий хяналтдаа байлгадаг байх;
  - (ii) зөвшөөрөлгүй этгээд агаарын хөлөгт ойртох, эсхүл агаарын хөлгийн бүхээгт нэвтрэхээс сэргийлдэг байх;
  - (iii) хүн, эсхүл зөвшөөрөгдөөгүй эд зүйлийг нуусан байж болзошгүй байрлалд анхаарал хандуулах зорилгоор олон улсын чиглэлийн үйлчилгээнд байгаа агаарын хөлгийг тойрч, нүдэн үзлэг хийдэг байх;
- (2) энэ зүйлийн (b)-д зааснаас бусад тохиолдолд, НАХ-ын ажилтан нь олон улсын чиглэлийн үйлчилгээнд байгаа бүх агаарын хөлгийн эргүүлийг дараах байдлаар хийдэг байх:
  - (i) тогтмол бус давтамжтай;
  - (ii) шөнийн цагаар, хоёр цаг тутамд 1-ээс доошгүй удаа;
  - (iii) өдрийн цагаар, дөрвөн цаг тутамд 1-ээс доошгүй удаа;
- (3) НАХ-ын ажилтан нь дараах нөхцөлд агаарын тээвэрлэгчийн төлөөлөгчийг агаарын хөлөгт ирэхийг шаарддаг байх:
  - (i) хоолойд (air-bridge) холбогдсон, хяналтгүй орхисон агаарын хөлөг нь хамгаалалтгүй бол;
  - (ii) тухайн агаарын хөлөг хөндлөнгийн халдлагад өртсөн байж болох шалтгаан байгаа бол.

(b) Тухайн НАХҮБ нь олон улсын нисэх буудлаас бусад аэродромд аюулгүйн хамгаалалтын үйлчилгээ үзүүлдэг бол НАХ-ын ажилтан нь дараах тохиолдолд тухайн аэродром дээр олон улсын чиглэлийн үйлчилгээнд байгаа агаарын хөлөгт энэ зүйлийн (a)(2)-т шаардсанаас бага хугацаагаар эргүүл хийж болно, хэрэв:

- (1) тухайн аэродромын үйл ажиллагаа эрхлэгч нь өөрийн 24 цагийн аюулгүйн хамгаалалттай бол;
- (2) НАХ-ын ажилтан нь хуваарьт нислэг гарах цагаас 90 минутын өмнө болон нислэг гарснаас хойш 15 минутын хугацаанд эргүүл хийдэг бол.

**A.19. Эргүүлийн тээврийн хэрэгсэл**

НАХҮБ-ын гэрчилгээ эзэмшигч нь аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд эргүүл хийхэд ашигладаг тээврийн хэрэгсэл нь дараах шаардлага хангасан болохыг бататгана:

- (1) аэродромын бусад хэрэглэгчдэд танигдахуйц таних тэмдэгтэй байх;
- (2) Даргын хүлээн зөвшөөрөхүйц стандартын дагуу тоноглогдсон байх.

**A.20. Нууцлал болон мэдээлэл**

НАХҮБ-ын гэрчилгээ эзэмшигч нь ангилсан баримт бичгийг дараах шаардлага хангасан болохыг бататгана:

- (1) ангиллаас нь хамааран сейфэнд, эсхүл түгжээтэй шүүгээнд хадгалдаг байх;

- (2) зөвхөн “мэдэж байх шаардлагад” үндэслэн, тэдгээрийг хүлээн авахаар зөвшөөрөгдсөн хувь хүн, эсхүл байгууллагад түгээдэг байх.

#### **A.21. Бусад байгууллагатай харилцах**

(a) НАХҮБ-ын гэрчилгээ эзэмшигч нь 140.61(а)(5)-д заасан байрлал бүрийн хувьд, дараах үүрэгтэй:

- (1) тухайн байрлал дахь үйл ажиллагааны аюулгүйн хамгаалалтад нөлөөлөх, нөөц төлөвлөгөөнд оролцох бусад бүх байгууллагатай зөвлөлдөх болон хамтарч ажиллах;
- (2) тухайн байрлалд байгаа бусад байгууллагын бүх ажилтны аюулгүйн хамгаалалтын мэдлэг чадварыг дээшлүүлэх хангалттай мэдээлэл өгөгдөж байгааг бататгах аюулгүйн хамгаалалтын хороо байгуулах.

(b) НАХҮБ-ын гэрчилгээ эзэмшигч нь энэ зүйлийн (а)(2)-ын дагуу байгуулагдсан аюулгүйн хамгаалалтын хороог 12 сард нэгээс доошгүй удаа хуралдуулж, хурлыг удирдах болон аюулгүйн хамгаалалтын хорооны уулзалтын тэмдэглэл хөтлөх үүрэгтэй.

#### **A.22. НАХ-ын ажилтны эрүүл мэндийн шаардлага**

НАХҮБ-ын гэрчилгээ эзэмшигч нь, эмнэлгийн үзлэгийн дүгнэлтэд үндэслэн тухайн этгээд ажил үүрэг гүйцэтгэхэд тохирч байгаа гэсэн үнэлгээг хийх хүртэл аливаа этгээдийг НАХ-ын ажилтны албан тушаалд томилдоггүй болохыг бататгана.

#### **A.23. Сургалт**

(a) НАХҮБ-ын гэрчилгээ эзэмшигч нь, түүний НАХ-ын ажилтан дараах шаардлагыг хангаснаас бусад тохиолдолд, тухайн ажил үүрэг гүйцэтгэдэггүй болохыг бататгах үүрэгтэй:

- (1) тэдний гүйцэтгэх үүрэгт хамаарах, энэ зүйлийн (с)-д заасан сэдвээр сургалтад хамрагдсан байх;
- (2) сургалтын төгсгөлд бичгийн шалгалт өгсөн байх;
- (3) хамрагдсан сургалтын сэдэв тус бүрээр, энэ зүйлийн (с)-д заасан ур чадварын түвшнийг хангасан байх.

(b) Энэ зүйлийн (с)-д заасан ур чадварын түвшний үнэлгээний тогтолцоо нь дараах хэлбэртэй байна:

- (1) Үнэлгээ - 1, тухайн сэдвийн ойлголтыг харуулна;
- (2) Үнэлгээ - 2, тухайн сэдвийн суурь мэдлэгийг харуулна;
- (3) Үнэлгээ - 3, тэдний ажил үүргээ гүйцэтгэх явцад үүсэж болзошгүй нөхцөл байдалд тухайн сэдвийн суурь мэдлэгээ ашиглах чадварыг харуулна;
- (4) Үнэлгээ - 4, тэдний ажил үүргээ гүйцэтгэх явцад үүсэж болзошгүй нөхцөл байдалд тухайн сэдвийн бүрэн мэдлэгээ ашиглаж шийдвэр гаргах чадварыг харуулна;

(5) Үнэлгээ - 5, тэдний ажил үүргээ гүйцэтгэх явцад үүсэж болзошгүй нөхцөлд тухайн сэдвийн бүрэн мэдлэгээ ашиглан нөхцөл байдлыг зөв тодорхойлж илэрхийлэх чадварыг харуулна.

(с) Энэ зүйлийн (а)-д заасан ажилтан нь дараах сэдвээр ур чадварын түвшин тогтоох сургалтад хамрагдаж, үнэлгээ хийлгэсэн байна:

(1) **Нисэхийн аюулгүйн хамгаалалттай холбогдолтой хууль тогтоомж:**

- (i) Үнэлгээ - 4, Эрүүгийн хуульд заасан, нийтийн аюулгүйн хамгаалалт, ашиг сонирхлын эсрэг гэмт хэргийн талаар;
- (ii) Үнэлгээ - 3, Хүний эрхийн холбогдолтой хууль тогтоомж болон хувь хүнд нэгжлэг хийх, эсхүл баривчлан саатуулах талаар (Эрүүгийн хэрэг хянан шийдвэрлэх тухай хуулийн холбогдох зүйл);
- (iii) Үнэлгээ - 5, Иргэний нисэхийн тухай хуульд заасан НАХ-ын ажилтны эрх, үүрэг болон хариуцлагын талаар;
- (iv) Үнэлгээ - 3, Хавсралт А-гийн А.26, А.27, А.28 болон ИНД-108.58-ын талаар;
- (v) Үнэлгээ - 3, ИНД-13 болон Зөрчлийн тухай хуулийн холбогдох зүйл, заалтын талаар;
- (vi) Үнэлгээ - 3, Хөдөлгөөний аюулгүй байдал, тээврийн хэрэгслийн ашиглалтын журмын эсрэг гэмт хэргийн талаар (Эрүүгийн хуулийн холбогдох зүйл);
- (vii) Үнэлгээ - 5, Хүч хэрэглэх болон баривчлах талаар (Эрүүгийн хэрэг хянан шийдвэрлэх тухай хуулийн холбогдох зүйл, заалт);

(2) **Зорчигч, тээшинд аюулгүйн үзлэг болон шалгалт хийх:**

- (i) Үнэлгээ - 4, зорчигч, тээшинд аюулгүйн үзлэг болон шалгалт хийх зохицуулалтын ерөнхий зарчмыг дүрслэх;
- (ii) Үнэлгээ - 4, гэрчилгээ эзэмшигчийн ашигладаг аюулгүйн үзлэгийн төхөөрөмжийн мэдлэгтэй ба ашиглахад мэргэшсэн байх;
- (iii) Үнэлгээ - 4, зорчигч, түүний тээшинд аюулгүйн үзлэг болон шалгалт хийх журам болон аргыг хэрэглэх дадлага туршлагатай байх;

(3) **Агаарын хөлгийн хорлон сүйтгэх ажиллагааны эсрэг шалгалт:** Үнэлгээ - 4, заналхийллийн дараа агаарын хөлөгт хорлон сүйтгэх ажиллагааны эсрэг шалгалт хийх шаардлагатай үед хариу үйлдлийг шалгах, эсхүл хэрэв тухайн агаарын хөлөг өмнө нь аюулгүйн үзлэг хийлгэлгүй үйлчилгээнд оролцсон бол түүнийг дараагийн нислэгийн өмнөх аюулгүйн үзлэгийн өмнө аюулгүй болохыг бататгахаар авах арга хэмжээний талаар;

(4) **Гар хийцийн тэсрэх төхөөрөмж:** Үнэлгээ - 3, НАХ-ын ажилтанд нисэх буудал, агаарын хөлөг, эсхүл зорчигчийн аюулгүйн үзлэгийн цэгт илэрч болох, иргэний нисэхийн аюулгүй байдалд нөлөөлдөг гар хийцийн тэсрэх төхөөрөмжийн талаар ойлголт өгөх;

(5) **Зэвсэглэсэн гэмт хэрэгтэнтэй харьцах:** Үнэлгээ - 3, НАХ-ын ажилтанд зэвсэглэсэн гэмт хэрэгтнийг саатуулах болон бусад этгээдийг тухайн заналхийллээс хамгаалах арга хэмжээний талаар зааварчилгаа өгөх;

(6) **Агаарын хөлөг барьцаалахын эсрэг хариу үйлдлийн журам:** Үнэлгээ - 2, НАХ-ын ажилтанд онгоц булаах үед мөрдөх журмын талаар ойлголт өгөх;

- (7) **Аюулгүйн хамгаалалтын явган болон хөдөлгөөнт эргүүл:** Үнэлгээ - 4, НАХ-ын ажилтанд урьдчилан сэргийлэх явган болон хөдөлгөөнт эргүүл, аюулгүйн хамгаалалтын зөрчлийн хариу үйлдлийн талаарх бүх талын мэдлэгийг олгох;
- (8) **Аэродром дээрх хөдөлгөөн:** Үнэлгээ - 5, НАХ-ын ажилтанд тухайн аэродром дээрх тээврийн хэрэгслийн хөдөлгөөний нарийвчилсан журмыг заах;
- (9) **Нисэхийн радио-холбооны үйл ажиллагаа болон журам:** Үнэлгээ - 4, НАХ-ын ажилтанд хязгаарлагдмал радио-холбооны операторын гэрчилгээний стандартын дагуу зөв радио-холбооны сахилга батын талаар заах;
- (10) **Заналхийллийн хүчин зүйл:** Үнэлгээ - 2, НАХ-ын ажилтанд алан хядах ажиллагаа болон гэмт хэргийн өнөөгийн хандлагын талаар шинэчилсэн мэдээлэл өгөх;
- (11) **Зэвсэг:** Үнэлгээ - 3, НАХ-ын ажилтанд нислэгийн өмнөх аюулгүйн үзлэгийн үеэр олон төрлийн галт зэвсэг болон түүнтэй төстэй зэвсгийг таньж тогтооход нь туслах зорилгоор мэдлэг олгох;
- (12) **Хууль бус үйлдлийн түүхэн баримт болон статистик:** Үнэлгээ - 2, НАХ-ын ажилтанд нисэхийн аюулгүйн хамгаалалтын түүхэн хөгжил болон хэрэг явдлын тархцын талаар мэдлэг олгох;
- (13) **Олон улсын гэрээгээр хүлээсэн үүрэг хариуцлагын талаарх баримт мэдээлэл:** Үнэлгээ - 1, НАХ-ын ажилтанд ICAO, Конвенцийн Хавсралт 17 болон түүнтэй холбоотой Doc 8973-ыг танилцуулах.

#### **А.24. Давтан сорилт хийх**

- (a) НАХҮБ-ын гэрчилгээ эзэмшигч нь НАХ-ын ажилтанд урьдчилан мэдэгдэлгүйгээр, стандарт сорилын биет ашиглан сорилт хийдэг болохыг бататгах үүрэгтэй.
- (b) Сорилтыг, аюулгүйн үзлэгийн үйл ажиллагааны бүрэн бүтэн байдалд үнэлгээ өгөх зорилгоор хийх ба тухайн сорилтод орж байгаа НАХ-ын ажилтанд стандарт сорилын биетийг илрүүлэх боломжийг олгох хэлбэрээр зохион байгуулах ёстой.
- (c) Даргын хүлээн зөвшөөрөхүйц байхаас бусад тохиолдолд, тухайн стандарт сорилын биетийг давтан сорилтод ашиглахыг зөвшөөрөхгүй.
- (d) Стандарт сорилын биет нь дараах шаардлагыг хангасан байх ёстой:
  - (1) зөвшөөрөгдөөгүй эд зүйлийг төлөөлдөг байх;
  - (2) үйл ажиллагааны бодит нөхцөлд ашиглагддаг байх.
- (e) Сорилтод орж байгаа, эсхүл давтан сорилтод орж байгаа НАХ-ын ажилтны ур чадварыг тодорхойлохдоо дараах хэмжүүрийг ашиглах ёстой:
  - (1) хэрэв сорилтын явцад стандарт сорилын биет бүрийг илрүүлсэн бол сорилтод орж байгаа НАХ-ын ажилтан тухайн шаардсан стандартыг хангаж байна гэж үзнэ;



- (2) хэрэв энэ зүйлийн (f) - (k)-ийн дагуу хийгдэж байгаа сорилтын явцад стандарт сорилын биетийг илрүүлээгүй бол сорилтод орж байгаа НАХ-ын ажилтан тухайн шаардсан стандартыг хангаагүй гэж үзэн дараах арга хэмжээг авах ёстой:
- (i) давтан сорилтод хамруулах;
  - (ii) давтан сорилтыг амжилттай өгөх хүртэл тухайн ажил үүргээс нь чөлөөлдөг байх;
- (3) хэрэв давтан сорилтоор стандарт сорилын биетийг илрүүлээгүй бол:
- (i) сорилт хийж байгаа шалгагч нь аюулгүйн хамгаалалтын удирдах ажилтанд мэдэгдэх үүрэгтэй;
  - (ii) аюулгүйн хамгаалалтын удирдах ажилтан нь тухайн алдааны бүртгэлийг хөтлөх үүрэгтэй;
  - (iii) аюулгүйн хамгаалалтын удирдах ажилтан нь, сорилтод тэнцээгүй НАХ-ын ажилтан бүрийг залруулах давтан сургалтад хамруулах ба дахин ажил үүрэг гүйцэтгэхийг зөвшөөрөхийн өмнө, ажилтныг тухайн даалгаврын стандартыг хангаж чадахыг харуулах сорилтод хамруулах үүрэгтэй.
- (f) Гэрчилгээ эзэмшигч нь металл илрүүлэгчийн сорилт хийгдэж байх үед дараах шаардлагыг бататгах үүрэгтэй:
- (1) сорилт хийж байгаа шалгагч нь стандарт сорилын биетийг Даргын хүлээн зөвшөөрөхүйц хэлбэрээр сорилын тээгчид нуудаг байх;
  - (2) тухайн сорилын тээгчийг дараах байдлаар нэвтрүүлдэг байх:
    - (i) хэрэв илрүүлэгч нь металл илрүүлэгч хаалга бол ердийн алхах хурдаар зорчигчийн урсгалын чиглэлд металл илрүүлэгч хаалгаар; эсхүл
    - (ii) тээврийн хэрэгсэлд суусан, эсхүл ачигдсан байдлаар;
  - (3) металл илрүүлэгч хаалганы дохиолол ажилласан бол тухайн шалгагч нь сорилтод орж байгаа НАХ-ын ажилтан гар-металл илрүүлэгч ашиглан, эсхүл биед нь шалгалт хийн стандарт сорилын биетийг таньж илрүүлж байгаа эсэхийг тогтоодог байх;
  - (4) гар-металл илрүүлэгчийн дохиолол ажилласан үед тухайн шалгагч нь сорилтод орж байгаа НАХ-ын ажилтан стандарт сорилын биетийг таньж илрүүлж байгаа эсэхийг тогтоодог байх;
  - (5) хэрэв стандарт сорилын биет ойртоход металл илрүүлэгч хаалганы, эсхүл гар-металл илрүүлэгчийн дохиолол ажиллаагүй бол:
    - (i) тухайн төхөөрөмжид алдаа байгаа талаар шалгагч аюулгүйн хамгаалалтын удирдах ажилтанд мэдэгддэг байх;
    - (ii) үйл ажиллагааны стандартыг хангах хүртэл тухайн металл илрүүлэгчийг үйлчилгээнээс гаргадаг байх.
- (g) Гэрчилгээ эзэмшигч нь, рентген төхөөрөмжид сорилт хийгдэж байгаа үед сорилт хийж байгаа шалгагч дараах шаардлагыг хангадаг болохыг бататгах үүрэгтэй:
- (1) тухайн стандарт сорилын биетийг аюулгүйн үзлэг хийгдэж байгаа цүнх саванд бусад эд зүйлийн хамт байрлуулдаг байх;
  - (2) сорилтод орж байгаа НАХ-ын ажилтан стандарт сорилын биетийг рентген төхөөрөмжийн дэлгэцэн дээр таньж, гар шалгалтаар стандарт сорилын биетийг илрүүлж чадаж байгаа эсэхийг тогтоодог байх;

- (3) тухайн агууламж нь рентген төхөөрөмжийн дэлгэцэн дээр зөв танигдахгүй байгаа үед НАХ-ын ажилтан нь гар шалгалт хийх хэрэгцээ шаардлагыг зөв тодорхойлох шийдвэр гаргах чадварт үнэлгээ хийдэг байх.
- (h) Гар шалгалтын сорилт хийгдэж байгаа үед гэрчилгээ эзэмшигч нь, сорилт хийж байгаа шалгагч дараах шаардлагыг хангадаг болохыг бататгах үүрэгтэй:
- (1) тухайн стандарт сорилын биетийг аюулгүйн үзлэг хийгдэж байгаа цүнх саванд бусад эд зүйлийн дунд нуудаг байх;
  - (2) сорилтод орж байгаа НАХ-ын ажилтан стандарт сорилын биетийг илрүүлсэн эсэхийг тогтоодог байх.
- (i) Үзлэгийн дараах бүсэд сорилт хийгдэж байгаа үед гэрчилгээ эзэмшигч нь, сорилт хийж байгаа шалгагч дараах шаардлага хангадаг болохыг бататгах үүрэгтэй:
- (1) үзлэгийн дараах бүсийг шалгахын өмнө стандарт сорилын биетийг тухайн бүсэд нуудаг байх;
  - (2) сорилтод орж байгаа НАХ-ын ажилтан тухайн стандарт сорилын биетийг илрүүлсэн эсэхийг тогтоодог байх.
- (j) Агаарын хөлгийг шалгах сорилт хийгдэж байгаа үед гэрчилгээ эзэмшигч нь, сорилт хийж байгаа шалгагч дараах шаардлага хангадаг болохыг бататгах үүрэгтэй:
- (1) зорчигч ердийн үед нэвтэрч болох тухайн агаарын хөлгийн аливаа хэсэгт стандарт сорилын биет нуудаг байх;
  - (2) сорилтод орж байгаа НАХ-ын ажилтан тухайн стандарт сорилын биетийг илрүүлсэн эсэхийг тогтоодог байх.
- (k) Гэрчилгээ эзэмшигч нь, тээврийн хэрэгслийн шалгалтын сорилт хийгдэж байгаа бол тухайн шалгагч дараах шаардлага хангасан болохыг бататгах үүрэгтэй:
- (1) тээврийн хэрэгслийн аливаа хэсэгт стандарт сорилын биетийг нуудаг байх;
  - (2) сорилтод орж байгаа НАХ-ын ажилтан тухайн стандарт сорилын биетийг илрүүлсэн эсэхийг тогтоодог байх.

#### **А.25. Өндөржүүлсэн аюулгүйн хамгаалалттай бүс**

##### ***Өндөржүүлсэн аюулгүйн хамгаалалттай бүсийн үзлэгийн цэг болон төхөөрөмж***

- (a) Гэрчилгээ эзэмшигч нь дараах шаардлагыг хангасан болохыг бататгах үүрэгтэй:
- (1) өндөржүүлсэн аюулгүйн хамгаалалттай бүс рүү нэвтэрч байгаа, эсхүл тухайн бүсэд байгаа хүмүүс, эд зүйл, бодис болон тээврийн хэрэгсэлд Даргын баталсан тусгай арга хэлбэр, эсхүл аргачлалын дагуу аюулгүйн үзлэг, эсхүл шалгалт хийдэг байх;
  - (2) өндөржүүлсэн аюулгүйн хамгаалалттай бүс рүү нэвтэрч байгаа, эсхүл тухайн бүсэд байгаа хүмүүс, тэдэнтэй холбоотой эд зүйл, бодис болон тээврийн хэрэгслийг оролцуулан аюулгүйн үзлэг, эсхүл шалгалтыг Сайдын, эсхүл Даргын шаардсаны дагуу хийдэг байх;
  - (3) Даргын баталсан тусгай арга хэлбэр, эсхүл аргачлалын дагуу аюулгүйн үзлэг болон шалгалтыг хийх хангалттай тооны ажилтан болон төхөөрөмжтэй байх;

- (4) түүний НАХ-ын ажилтан нь, аюулгүйн үзлэгийн төхөөрөмжийг чадварлагаар шалгадаг болохыг бататгах зорилгоор стандарт сорилын биетийг ашиглах зааварчилгаа авдаг байх;
- (5) өндөржүүлсэн аюулгүйн хамгаалалттай бүсийн аюулгүйн үзлэгийн цэгт ашиглаж байгаа аюулгүйн үзлэгийн аппаратад Даргын хүлээн зөвшөөрөхүйц хэлбэрээр сорилт хийдэг байх.

**Хүмүүс, эд зүйл, бодис болон тээврийн хэрэгсэлд аюулгүйн үзлэг хийх**

(b) Гэрчилгээ эзэмшигч нь аюулгүйн үзлэг хийхдээ дараах шаардлагыг хангасан байх үүрэгтэй:

- (1) аюулгүйн үзлэг болон шалгалт хийгдэж байгаа цэг бүрд, аливаа этгээд өндөржүүлсэн аюулгүйн хамгаалалттай бүсэд нэвтрэхээс өмнө аюулгүйн үзлэгээр заавал орохыг анхааруулсан дараах мэдээллийг байрлуулсан байх:
  - (i) аливаа этгээд, эсхүл эд зүйл, бодис, эсхүл тухайн этгээдийн хяналтад байгаа тээврийн хэрэгсэлд аюулгүйн үзлэгийг зөвхөн тухайн этгээдийн зөвшөөрөлтэйгээр хийх;
  - (ii) аюулгүйн үзлэг хийлгэхээс татгалзсан этгээдийг тухайн цэгээр нэвтрүүлдэггүй байх;
- (2) хэрэв аюулгүйн үзлэгийг өндөржүүлсэн аюулгүйн хамгаалалттай бүсэд хийж байгаа бол аюулгүйн үзлэг хийгдэх этгээдэд дараах шаардлагыг мэдэгдсэн байх:
  - (i) аливаа этгээд, эсхүл эд зүйл, бодис, эсхүл тухайн этгээдийн хяналтад байгаа тээврийн хэрэгсэлд аюулгүйн үзлэгийг зөвхөн тухайн этгээдийн зөвшөөрөлтэй хийдэг байх;
  - (ii) аюулгүйн үзлэг хийлгэхээс татгалзсан этгээдийг тухайн өндөржүүлсэн аюулгүйн хамгаалалттай бүсийг орхин гарахыг шаарддаг байх;
- (3) Даргын баталсан тусгай арга хэлбэр, эсхүл аргачлалын дагуу дараах бүртгэл хөтөлдөг болохыг бататгасан байх:
  - (i) тухайн аюулгүйн үзлэгийн арга;
  - (ii) Сайдын, эсхүл Даргын шаардсан, аюулгүйн үзлэгийн үргэлжлэх хугацаа;
  - (iii) аюулгүйн үзлэгт хамрагдсан хүмүүс, эд зүйл, бодис болон тээврийн хэрэгслийн тоо;
- (4) хэрэв зөвшөөрөгдөөгүй эд зүйл илэрсэн бол дараах бүртгэл хөтөлдөг болохыг бататгасан байх:
  - (i) аюулгүйн үзлэг хийсэн ажилтны нэр;
  - (ii) илэрсэн зөвшөөрөгдөөгүй эд зүйл;
  - (iii) зөвшөөрөгдөөгүй эд зүйлийг аюулгүй болгох арга хэмжээ.

(c) Аюулгүйн үзлэгийн явцад, гэрчилгээ эзэмшигч нь дараах үүрэгтэй:

- (1) түүний НАХ-ын ажилтан нь аливаа этгээд, эд зүйл, бодис, эсхүл тээврийн хэрэгсэлд аюулгүйн үзлэг хийхдээ, тухайн этгээд зөвшөөрөгдөөгүй эд зүйл тээвэрлээгүй, эсхүл биедээ авч яваагүй болохыг бататгах;
- (2) түүний НАХ-ын ажилтан, зөвшөөрөгдөөгүй эд зүйл биедээ авч явсан нь илэрсэн этгээдийг өндөржүүлсэн аюулгүйн хамгаалалттай бүсэд нэвтрэхийг зөвшөөрдөггүй болохыг бататгах;

- (3) түүний НАХ-ын ажилтан, зөвшөөрөгдөөгүй эд зүйл биедээ авч явсан нь илэрсэн этгээдийг өндөржүүлсэн аюулгүйн хамгаалалттай бүсийг орхихыг шаарддаг болохыг бататгах;
- (4) дараах шаардлагыг бататгах зорилгоор, сорилт, эсхүл шалгалтын үр дүнгийн бүртгэл хөтөлдөг болохыг:
  - (i) аюулгүйн үзлэгийн үнэн зөв байдлыг бататгах зорилгоор 28 хоног тутамд шалгах;
  - (ii) аюулгүйн үзлэг гүйцэтгэж байгаа НАХ-ын ажилтнуудын ур чадварыг Хавсралт А.24-т заасан давтан сорилт хийх шаардлагын дагуу 150 хоног тутамд шалгах.

### **Эд зүйл, эсхүл бодисыг гараар шалгах**

(d) Гэрчилгээ эзэмшигч, хэрэв эд зүйл, эсхүл бодист тэсрэх хэрэгсэл агуулагдсан гэж сэжиглэх шалтгаан байгаа бол, эсхүл сэжигтэй тэсрэх хэрэгсэл илэрсэн бол түүний НАХ-ын ажилтан нь Хавсралт А.11(b)(5)-д шаардсан журмыг мөрддөг болохыг бататгах үүрэгтэй.

(e) Гэрчилгээ эзэмшигч нь дараах шаардлагыг бататгах зорилгоор, сорилт, эсхүл шалгалт хийж, тэдгээрийн үр дүнгийн бүртгэл хөтлөх үүрэгтэй:

- (1) гар шалгалтын үнэн зөв байдлыг 28 хоног тутамд хийдэг байх;
- (2) гар шалгалт гүйцэтгэж байгаа НАХ-ын ажилтнуудын ур чадварыг Хавсралт А.24-т заасан давтан сорилт хийх шаардлагын дагуу 150 хоног тутамд авдаг байх.

### **А.26. Аюулгүйн хамгаалалттай холбоотой хориг (шилжилт)**

ИНД-91.9-ийн дагуу Дарга эрх олгосноос бусад тохиолдолд, аливаа этгээдийг аюулгүйн хамгаалалтын хяналтаар орсон этгээдэд дараах эд зүйлийг дамжуулах, эсхүл түүнийг аюулгүйн хамгаалалтын хяналт хийгдсэн агаарын хөлгийн бүхээгт байгаа этгээд авах боломжтой байрлалд тавихыг зөвшөөрөхгүй:

- (1) галт зэвсэг;
- (2) аюултай, эсхүл хор хөнөөл учруулах зэвсэг, эсхүл бусад төрлийн хэрэглэл;
- (3) сум хэрэгсэл;
- (4) тэсрэх бодис, эсхүл хэрэгсэл, эсхүл гэмтэл учруулах бодис, эсхүл агаарын хөлгийн, эсхүл агаарын хөлгийн бүхээгт байгаа хүмүүсийн аюулгүй байдалд аюул учруулахад ашиглаж болох бусад төрлийн хэрэгсэл.

### **А.27. Зөвшөөрөгдөхгүй үйлдэл (шилжилт)**

Эрх бүхий этгээдийн зөвшөөрөлгүйгээр, аливаа этгээд нь дараах үйлдэл хийхгүй байх үүрэгтэй:

- (1) аюулгүйн хамгаалалттай бүс, өндөржүүлсэн аюулгүйн хамгаалалттай бүс, эсхүл үйл ажиллагааны бүсэд нэвтрэх боломжийг хянах зорилгоор хийсэн хаалга, хашаа, эсхүл аэродромын бусад хаалт, хашааг нээлттэй, эсхүл хамгаалалтгүй, эсхүл бусад хэлбэрээр хяналтгүй үлдээх; эсхүл

- (2) аюулгүйн хамгаалалттай бүс, өндөржүүлсэн аюулгүйн хамгаалалттай бүс, эсхүл үйл ажиллагааны бүсэд зөвшөөрөлгүй нэвтрэхээс сэргийлэхэд ашиглагдаж байгаа хашаа, хаалт, эсхүл бусад зүйлийн дэргэд, эсхүл дээр нь хяналтын арга хэмжээнээс зайлсхийх боломж олгох зорилгоор, аливаа эд зүйлийг урьдчилан байрлуулах, тавих, эсхүл үлдээх.

#### **А.28. Нисэх буудлын нэвтрэх үнэмлэх (шилжилт)**

(a) Дарга дараах тохиолдолд, нисэх буудлын нэвтрэх үнэмлэх, эсхүл бусад нэвтрэх баримт бичгийг энэ дүрмийн дагуу олгож, эсхүл зөвшөөрч болно, хэрэв:

- (1) үнэмлэх, эсхүл баримт бичиг авах хүсэлт гаргасан этгээдийг тодорхойлох аюулгүйн хамгаалалтын зохих шалгалтыг Хуулийн дагуу хийсэн бол; эсхүл
- (2) тухайн этгээдийг Даргын хүлээн зөвшөөрөхүйц аюулгүйн хамгаалалтын дүйцэх өөр шалгалтад тэнцсэн гэж үзсэн бол.

(b) Энэ зүйлийн (c), (g)-г харгалзан, дараахаас бусад тохиолдолд, аливаа этгээдийг аэродром, эсхүл навигацийн байгууламжийн аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд нэвтрэх, эсхүл тухайн бүсэд үлдэхийг зөвшөөрөхгүй:

- (1) нисэх буудлын нэвтрэх үнэмлэхийг хувцасны гадна энгэрт, ил харагдахаар зүүсэн бол; эсхүл
- (2) энэ зүйлийн (a)-ийн дагуу зөвшөөрсөн хугацаанд өөр нэвтрэх баримт бичиг, эсхүл бусад нэвтрэх баримт бичгийг биедээ авч яваа бол.

(c) Дарга, нисэх буудлын нэвтрэх үнэмлэх эзэмшигчийн нэрийг ил болгохгүй байх нь зүйтэй гэж үзсэн тохиолдолд, үнэмлэх эзэмшигчийн нэр заагаагүй нэвтрэх үнэмлэх зүүхийг зөвшөөрч болно.

(d) Энэ дүрмийн дагуу аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд нэвтрэх зөвшөөрөл олгогдсон этгээд нь зөвхөн ажил үүргээ гүйцэтгэх зорилгоор тухайн бүсэд үлдэж болно.

(e) Хэрэв эрх бүхий этгээд шаардвал, аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд нэвтрэх этгээд нь нисэх буудлын нэвтрэх үнэмлэх, эсхүл энэ зүйлийн (a)-ийн дагуу эрх олгосон бусад нэвтрэх баримт бичгийг шалгуулах үүрэгтэй.

(f) Хэрэв нисэх буудлын нэвтрэх үнэмлэх эзэмшигч нь үнэмлэх шаардлагатай ажлын байранд ажиллахаа больсон, эсхүл бусад шалтгаанаар үнэмлэх эзэмших эрхгүй болсон бол үнэмлэх олгосон эрх бүхий байгууллагад үнэмлэхээ нэн даруй буцаан өгнө.

(g) Энэ зүйлийн (b) нь дараах этгээдэд хамаарахгүй:

- (1) тухайн этгээд байнга оршин суудаг улсын засгийн газрын эрх бүхий байгууллагын, эсхүл ажил олгогчийн олгосон албан ёсны нэвтрэх үнэмлэхийг хувцасны гадна талд зүүсэн, олон улсын үйлчилгээний агаарын хөлгийн багийн гишүүнд; эсхүл
- (2) албан ажлын шаардлагаар нууцлагдмал байх шаардлагатай Монгол Улсын засгийн газрын агентлагийн албан тушаалтанд; эсхүл

- (3) хэрэв аливаа этгээд нь тухайн нислэгийн хүчинтэй суугчийн тасалбартай, эсхүл багийн гишүүн, эсхүл үйл ажиллагаа эрхлэгчийн төлөөлөгч түүнийг дагалдаж яваа бол нислэгээр явах, эсхүл нислэгээс буух зорилгоор аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд нэвтрэх, эсхүл бүсээс гарах зорчигчид; эсхүл
- (4) хэрэв тухайн хөлгийн дарга нисгэгчийн хүчинтэй үнэмлэхээ биедээ авч яваа бол, агаарын хөлөгт суух, буух, эсхүл үйлчилгээ хийх зорилгоор аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд байгаа, эсхүл түүнд нэвтрэх хувийн нислэг үйлдэх агаарын хөлгийн даргад, болон тухайн агаарын хөлгийн даргын дагуулж яваа аливаа этгээдэд.

(h) Хэрэв нэвтрэх үнэмлэх авах хүсэлт гаргасан этгээдэд Дарга аюулгүйн хамгаалалттай бүс, эсхүл өндөржүүлсэн аюулгүйн хамгаалалттай бүсэд нэвтрэх болон үлдэхийг зөвшөөрсөн түр нэвтрэх үнэмлэх олгосон ба түүнийг Хавсралт А.28(а)(1), (2)-т заасны дагуу аюулгүйн хамгаалалтын шалгалтын үйл явцын дагуу олгосон нисэх буудлын нэвтрэх үнэмлэхтэй этгээд дагалдаж байгаа бол тухайн этгээдэд Хавсралт А.28(а)(1), (2)-т заасан аюулгүйн хамгаалалтын шалгалт хийхийг шаардахгүй.

--oOo--